


TEZAU LITURGIC

13 IUNIE

SLUJBA SF. CUVIOASE ALEXANDRA MELGUNOVA DE LA DIVEEVO



MINEIUL PE IUNIE
MOSCOVA



Месяца иуния в 13-й день Преподобныя Александры Дивеевския

На малей вечерни

На Господи, возвах: стихиры, глас 2:

Кая духовная пеня/ принесем ти,
преподобная Александро?/ Явлением бо тебе
Царицы Небесныя/ Дивеево дивно освятися/ и
четвертый жребий Ея наречется./ Сего ради
молим тя/ подати нам мир и велию милость.

Киими похвальными венцы/ венчаим тя,
преподобная Александро?/ Ты бо, в
многотруднем житии/ волю Божию
усмотревши,/ в благодарении Господу николиже
оскудевала еси./ Темже моли Христа Бога/
подати нам мир и велию милость.

Киими благоговейными усты/ восхвалим
преславную мать нашу Александру?/
Милостивую покровительницу и скорую
помощницу,/ любовью своею нас
согревающую,/ кротостию и смирением вся
удивляющую/ и просящую нам у Христа Бога/
мир и велию милость.

Киими священными похвалами/ прославим
Александру богомудрую?/ Обители Дивеевския
украшение,/ монашествующих истинную

наставницу/ и молитвенницу теплую о душах наших,/ просящую нам у Христа Бога/ мир и велию милость.

Слава, глас 4:

Днесь благодарственная воспоим/ дивному во святых Христу Богу нашему,/ даровавшему нам мать преподобную,/ мудрую и чадолюбивую наставницу,/ церковных уставов твердую хранительницу,/ непорочное житие совершившую,/ ныне же в лице жен святых сияющую.

И ныне, Богородичен, глас тойже: Иже Тебе ради:

На стиховне стихиры, глас 1:

Велия твоя подвиги и труды,/ преподобная Александро блаженная,/ како прославим, недостойнии?/ Ты бо, обитель Дивеевскую основавши,/ иноческое житие в ней устроила еси.

Стих: Дивен Бог во святых Своих,/ Бог Израилев.

Великий ангельский образ восприемши/ и послушание Царицы Небесныя исполнивши,/ душу в руке Божии вверила еси./ И ныне с лики жен преподобных/ чисте зриши Святую Троицу.

Стих: Честна пред Господем/ смерть преподобных Его.

Велию благодать и дар исцелений,/ еще
живей ти сущи, стяжавши,/ Александро
преподобная,/ ныне наша прошения
исполняеши/ к раце святых мощей твоих/ с
любовию притекающих.

Слава, глас 8:

О, преславнаго чудесе!/ Днесь радуется
обитель Дивеевская,/ исполнению проречения
преподобнаго Серафима дивящися:/ се бо мощи
преподобныя Александры,/ яко многоценное
сокровище,/ в храме Рождества Богородицы
почивают/ и, яко крин присноцветущий,/
благоуханием чудес всех притекающих
исполняют.

И ныне,

Богородичен, глас тойже: Безневестная Дево:

Тропарь зри на велицей вечерни. Слава и ныне,
Богородичен: Радуйся, дворе Господня:

На велицей вечерни

На Господи, возвах: стихиры, глас 6:

Приидите, вернии людие,/ во святую обитель
Дивеевскую,/ яже четвертый жребий Божия
Матере нарицается,/ ублажим верную рабу
Пресвятая Богородицы/ Александру
богомудрую,/ первоначальницу святаго места

сего,/ и, припадающе к ея честным и многоцелебным мощем,/ усердно помолимся:/ помяни нас, преподобная мати наша,/ во Царствии Небеснем.

Приидите, вернии людие,/ во святую обитель Дивеевскую/ прославим чудную собеседницу ангелов/ и нуждающимся помощницу скорую,/ всечестную мать Александру,/ первоначальницу святого места сего:/ та бо, Христа всем сердцем возлюбивши,/ многотрудное житие избра,/ ныне во славе невечерней Ему предстоит/ и молится о спасении душ наших.

О, преподобная мати наша Александро,/ Божественною просветившись благодатию/ и мятеж мира отвергши,/ евангельски Христу последовала еси/ и молитвами Пречистой Богородице неустанно послужила еси./ Темже, и обители Ея первоначальница сущи,/ богомудрая наставница явилася еси./ Помяни нас во Царствии Небеснем.

Александро всеблаженная,/ ангельский образ восприемши,/ на земли добродетельне пожила еси/ и, храмы многия воздвигши,/ сирья, нищия и в бедах сущия николиже оставляла еси,/ ныне же, на Небесех водворившись,/ чисте зриши Святую Троицу./ Испроси нам,

преподобная мати, велию милость,/ да и мы
всегда с Господем будем.

Многия подвиги, труды и болезни,/ блаженная
Александро, явила еси,/ егда в тесней келии пред
распятием Христовым,/ на камень главу полагаючи,/ со
слезами нощию усердно молилася еси./ Помози и нам в
покаянии истиннем житие скончати/ и Царствия
Небеснаго сподобитися.

Глас 7:

Надеющиеся на Господа разумеют истину/ и
вернии в любви пребудут Ему./ Тако и ты,
богомудрая Александро,/ светом Евангелия тьму
неразумия просветивши,/ истины веры
Православных людем уясняла еси/ и
живоносныя воды любви верным источила еси./
Укрепи и нас во благочестии и чистоте
пребывати/ и моли Христа Бога/ да спасет
души наша.

Глас 8:

Ублажаем тя, Александро досточудная,/ ты
бо, о ближних попечение творящи,/ алчущих
милостивая питательница,/ невест неимущих
благоукрашительница/ и скорбных теплая
утешительница явилася еси./ Темже,
припадающе к раце мощей твоих,/ со
умилением просим тя:/ прими молитвы наша/

и предвари на помощь/ верою память твою почитающим.

Слава, глас 6:

О, Александро блаженная,/ преподобный Серафим свидетельствова о тебе,/ яко ты еси велия раба Божия,/ смирения высото и любви сокровище,/ и о всех теплая молитвенница./ Ныне зрим тя, яко щит крепок обители нашея/ противу стрел вражиих,/ заступлением бо твоим искушения побеждаются/ и души наша очищаются.

И ныне,

Богородичен, глас 6: Кто Тебе не ублажит:

Вход. Прокимен дне. И чтения преподобническая.

На литии стихира собору Дивеевских святых,
глас 1:

Блаженна еси, чудная обитель Дивеевская,/ славни вси пределы твои,/ стопы Пресвятыя Богородицы освященнии/ и подвиги святых прославленнии,/ ихже всехвальную память совершающе,/ славословим Христа Бога нашего, дивнаго во святых Своих,/ Емуже молимся спастися душам нашим.

Слава, и ныне, глас 4:

Воспоим неусыпающую в молитвах Богородицу/ и, притекающе к Ней с верою сердечною,/ потщимся стяжати милосердие и кротость,/ да обрящем Ея заступлением/ у Христа Бога велию милость.

На стиховне стихиры, глас 2.

Подобен: Егда от Древа:

Егда Божественный глас/ достиже тя, преподобная мати Александро,/ тогда, богатство и славу,/ и род твой оставивши,/ во обитель Флоровскую вселилася еси,/ идеже, житие жестоко поживши,/ в молитвах и трудах Господеви угодила еси./ Темже молися Христу Богу/ спасти и просветити души наша.

Стих: Дивен Бог во святых Своих,/ Бог Израилев.

Егда благодать Божественная/ исполни сердце твое, преподобная мати,/ тогда явися ти Пресвятая Дева,/ Царица Небесе и земли,/ повелевающи град Киев оставити/ и обитель новую/ во инем месте устроить,/ да славится в ней имя Христа Бога,/ Егоже моли спасти и просветити души наша.

Стих: Честна пред Господем/ смерть преподобных Его.

Егда Матерь Божия явися ти, преподобная
Алекса̀ндро, / на пути в пустынь Саровскую / и
повеле устроить в Дивееве обитель чудную, /
тогда, преславныя глаголы Ея / в сердце своем
слагаючи / и повеление исполняючи, / многими
труды и подвиги / обители доброе начало
положила еси. / Темже молися тепле ко Господу /
спасти и просветити души наша.

Слава, глас 4:

В честнем прославлении твоём, /
преподобная мати Алекса̀ндро, / верныя
благодатно озаряеши / и недуги безмездно
врачуеши. / Темже, с любовью припадающе к
раце мощей твоих, / умильно глаголем: / настави
ны ходити путем подвигов твоих / и помози нам
благоугождати Христу Богу, / да причастницы
Небеснаго Царствия сподобимся быти.

И ныне, Богородичен, глас тойже: Призри на
моления Твоих раб, Всенепорочная:

Тропарь, глас 5:

Преподобная мати Алекса̀ндро, /
благословение Царицы Небесныя исполнивши, /
обитель Дивеевскую основала еси, / в нейже,
многотрудное житие совершивши, / образ
Христова смирения явила еси. / Темже помяни
нас во Царствии Небеснем.

На утрени

По 1-м стихословии седален, глас 4:

Всем сердцем твоим, всею душою и мыслию
Бога возлюбивши, / дар благодатных слез, мати
Александро, стяжала еси / и пред Крестом
Христовым усердно молилася еси, / непрестанно
в созерцании Господа пребывающи. / Темже,
искусная делательница молитвы умныя сущи, /
научи и нас присно глаголати: / Господи, Иисусе
Христе, Сыне Божий, помилуй нас, грешных.

Слава, и ныне, Богородичен:

Удивишася, Чистая, лица ангельстии, / како,
Богородица сущи, / во юдоль скорбей
человеческих нисходиши, / и всякий вопль
молитвенный слышиши, / и утешение
милостивно подаеши, / больных исцеляеши и
немощих заступаеши, / Дево Мати Господня, /
Сокровище неисчерпаемое благодати
Божественныя.

По 2-м стихословии седален, глас 8:

Страстотерпец царь Николай благоговейно
почиташе память твою, / мати Александро. /
Сего ради вопием ти, мати преподобная: / моли с
Царственными страстотерпцы Христа Бога, о
еже спастися нам.

Слава, и ныне, Богородичен:

О Тебе радуется и Тя прославляет всякая тварь, Дево Пречистая,/ яко Невместимаго вместила еси,/ Егоже присно моли о спасении нашем.

Величание:

Ублажаем тя,/ преподобная мати наша Александро,/ и чтим святую память твою,/ ты бо молиши о нас/ Христа Бога нашего.

По полиелеи седален, глас 1:

Егда приближися время преставления твоего, Александро преподобная,/ тогда духом отшествия твоего ко Господу уразумела еси/ и, молитву сугубую со слезами о обители твоей и сестрах ея вознесши,/ попечение о них на преподобнаго Серафима возложила еси.

Слава, и ныне, Богородичен:

Притецем вси, вернии,/ к Небесней Царице и Матери всех,/ прославляюще Ея снисхождение к роду человеческому,/ и источим слезы умиления,/ любовь зовуще:/ радуйся, Обрадованная,/ верных Твоих рабов не оставляющая.

Прокимен, глас 4: Дивен Бог во святых Своих,/ Бог Израилев. Стих: В церквах благословите Бога, Господа от источник

Израилевых. Всякое дыхание: Евангелие от Матфея, зачало 104.

По 50-м псалме стихира, глас 6:

Пред отшествием от жития сего временнаго/
в схиму великую, преподобная Александро,
облеклася еси/ и, Святых Таин Христовых
приобщившись,/ Казанскую икону Пресвятыя
Богородицы на перси возложила еси,/ молитву
же непрестанную во устех имущи,/ душу святую
в руце Христа Бога предала еси./ Тому молися
не лишенным и нам быти/ кончины благия и
наследия Небеснаго.

Канон, глас 8.

Песнь 1

Ирмос: *Поим Господеви,/ проведшему люди
Своя сквозе Чермное море,/ яко Един славно
прославися.*

Преподобную угодницу и мать нашу
Александрю,/ первоначальницу обители
Дивеевския,/ Божия Матере рабу избранную,/
ныне за ны на Небесех молящуюся,/ Господи,
сподоби воспети разумно.

Обители Дивеевския первоначальница
явилася еси, Александро славная,/ и, достойно
послушание Пресвятыя Богородицы
исполнивши,/ Небесное Царствие унаследовала

еси./ Помози и нам добродетель послушания
стяжати.

Воздержанием дивным и покаянием слезным
душу твою очистивши/ и ангельскому житию
поревновавши,/ храм Святаго Духа явилася еси,
преподобная Александро.

Богородичен: Пречистая Богородице Дево,/
паче естества неизреченно рождшая
Присносущное и Пребожественное Слово,/
достойно в песнях величаем Тя.

Песнь 3

Ирмос: *Утверждаей словом Небеса/ и землю
основавий на водах многих,/ утверди мя к
пению славословия Твоего, Господи.*

Мирская и тленная возненавидевши,/ плоть
свою изнурила еси, мати Александро,/ темже и,
молитву к Богу присно возносящи,/ Того
Единого возлюбила еси.

Просвещение Духа в сердце твоём приемши,
преподобная мати,/ лучами добродетелей
страстей мглу яве отгнала еси./ Помози и нам от
омрачения страстей избавиться.

Твоя молитвы и труды,/ яко кадило
благовонное, Владыце и Богоматери принесла
еси, преподобная,/ таже и многи храмы Божия
твоим рачением и подвиги воздвигла еси./ Ныне

же вознеси моление о благостоянии Церкви Русския.

Богородичен: Утверждение, покров и прибежище/ буди с верою к Тебе прибегающим, Дево Богородительнице,/ и Божию Матерь Тя исповедающим.

Седален, глас 3.

Подобен: Красоте девства:

Богатство тленное и славу мимотекущую в младых летех оставивши,/ Небесное богатство и славу вечную восприяла еси, преподобная Александро./ Темже блажим святое твое преставление и умильно вопием:/ помяни нас у Престола Божия, мати честная.

Слава, и ныне, Богородичен:

Яже радости приемшая исполнение,/ приими от нас, рабов Твоих, целование Архангелово:/ радуйся, Радость миру рождшая,/ радуйся, Манно Небесная, Хлебом жизни нас напитавшая,/ радуйся, Царице, в женах Благословенная.

Песнь 4

Ирмос: *Тайно пророк предзря от Девы Тя, Слове, Воплощаема,/ песенно вопияше:/ слава силе Твоей, Господи.*

Огнем любви Божия терние страстей
попаливши,/ глаголы дивныя Пресвятая
Богородицы о четвертом Ея жребии во
вселенной услышати сподобилася еси./ Темже и
обитель Дивеевскую воздвигла еси.

Насаждена в дому Божия Матере бывши,/
яко цветы красныя, многия добродетели
израстила еси/ и, во основание обители камень
веры положивши,/ многим инокинем путь во
обители Небесныя указала еси.

Жезлом добродетельныя твоя жизни/
многия души в Царствие Небесное управила еси,
мати Александро,/ помози и нам добродетели
евангельския стяжати/ и жизни блаженныя
вкупе со всеми святыми достигнути.

Богородичен: Ты еси, Благая, верным
утверждение,/ от лютых избавление и
просвещение душ наших,/ и обители
Дивеевской стена и ограждение.

Песнь 5

Ирмос: *Утренююще, вопием Ти:/ Господи,
спаси ны,/ Ты бо еси Бог наш,/ разве Тебе, иного
не вемы.*

Тесный путь паче пространнаго предпочла
еси/ и, радуящися, многия труды и болезни
претерпела еси, преподобная Александро./

Укрепи и ны во обстояниих житейских молитвами твоими.

В пениих и пощениих, молитвах же и бдениих поживши, преподобная,/ Христу уневестилася еси/ и образ иноческаго жития/ сестрам обители Дивеевския явила еси.

Житие твое праведно и преподобно бысть, Александро блаженная,/ темже, сугубаго подвига взыскующи,/ великую схиму пред кончиною прияти сподобилася еси.

Богородичен: От всякаго прилога противна и скорби,/ и от враг лютых рабы Твоя свободи, Всенепорочная,/ Тя бо державное Предстательство стяжахом.

Песнь 6

Ирмос: *Ризу мне подаждь светлу,/ одеяйся светом, яко ризою,/ Многомилостиве Христе Боже наш.*

Славу рода твоего презревши/ и заповеди евангельския ревностне исполнивши, преподобная,/ Христа ради обнищала еси/ и многими добродетельми обогатилася еси.

Великаго подвижника Саровскаго/ в юнем иеродиаконе Серафиме предузрела еси, Александро мудрая,/ и попечение о обители Дивеевской на него возложила еси./ Помозите и

нам, святии угодницы, наследники Царствия Небеснаго быти.

По вся дни и нощи Богу благоугождаючи,/ в час кончины твоя Святая Тайны Христовы восприяла еси./ Вознеси, преподобная мати, теплыя молитвы и о нас ко Господу,/ да христианскую кончину уллучити сподобимся.

Богородичен: Палата Царя Славы и Престол огнезрачный была еси, Дево,/ Херувим превышши и Серафим славнейши,/ темже всякое дыхание славит Тя,/ яко Матерь Христа, Бога нашего.

Кондак, глас 3:

Воспоим днесь, вернии,/ преподобную мать нашу Александру,/ дивнаго удела Пресвятыя Богородицы первоначальницу,/ да ея молитвами и предстательством Пречистыя Девы/ Господь подаст нам грехов прощение и велию милость.

Икос:

Кто доволен достойно воспети труды и болезни,/ подвиги и пощения твоя, преподобная мати Александро?/ Обаче благоприятными твоими к Богу молитвами/ подаждь нам ныне благодать Святаго Духа,/ да прославим терпение и смирение твоя/ и любовь

нелицемерную воспоим,/ и миже врага
всезлобнаго посрамила еси./ Темже молися ко
Господу/ даровати нам грехов прощение и
велию милость.

Песнь 7

*Ирмос: В начале землю основавый/ и Небеса
Словом утвердивый,/ благословен еси во веки,
Господи Боже отец наших.*

Путем шествующи, вводящим в
Божественный покой,/ уклонилася еси сетей
демонских, блаженная./ Темже, Божественною
благодатию покрываема, вопияла еси:/
благословен еси, Боже отец наших.

Повеление Царицы Небесныя исполняючи/
и чудную обитель Ея созидаючи,/ выну в
молитве пребывала еси, вопиющи:/ благословен
еси, Боже отец наших.

Камень под главу твою полагаючи и слез
токи проливаючи,/ жестокое житие
провождала еси, преподобная,/ и в радости
духовней воспевала еси:/ благословен еси,
Господи Боже отец наших.

Богородичен: Вся светоносна еси, Дево, Свет
незаходимый приемши,/ и просвещаеши,
Чистая, верою Тебе вопиющих:/ благословен,
Пречистая, Плод чрева Твоего.

Песнь 8

Ирмос: *Безначальнаго Царя славы,/ Егоже
трепещут Небесныя силы,/ пойте,
священницы,/ людие, превозносите во вся веки.*

Мученице царице Александре поревновала
еси, богомудрая,/ и жизнь твою в руке Божии
предала еси,/ точию Единого Христа ведущи и
Сего распята,/ поющи Его во вся веки.

Дар молитвы чистыя, смирение и любовь
совершенную имела еси, богоблаженная./
Молися и нам в добродетели сия облещися/ и
Господа воспевати во вся веки.

Заповедем Христовым поревновавши,/
нищия, сирья и младенцы николиже в беде
оставляла еси, досточудная,/ темже вселилася
еси во обители Небесныя,/ идеже с лики жен
честных Господа прославляеши во вся веки.

Богородичен: Все упование мое на Тя
возложих, Владычице,/ не имам бо иныя
помощи разве Тебе./ Темже подаждь ми богатую
Твою милость.

Песнь 9

Ирмос: *Невидимаго зраком Божественным
приемшая,/ Неискусобрачная Дево и Мати,/
песньми Рождество Твое величаем.*

Яко велию в женах и избранницу Матере
Божия,/ откры ты Бог преподобному

Серафиму,/ иже и яви сугубое попечение о обители Дивеевской./ Темже купно с ним молися о чадах твоих, блаженная.

Пред кончиною твоею, мати преподобная,/ образ Казанския иконы Пресвятыя Богородицы на перси твоя возложила еси/ и тако с миром душу твою Богу предала еси.

Моли милостиваго Бога, преподобная мати наша Александро,/ яко дерзновение к Нему имущая,/ да и мы с тобою сподобимся славити Его во Царствии Небеснем.

Богородичен: Спаси, Пречистая Владычице, к Тебе прибегающия от беды и напастей,/ от греха и бури страстей плотских,/ от волнений и обстояний житейских,/ и будущаго осуждения.

Светилен:

Егда убо честныя мощи твоя, преподобная мати Александро, обретошася,/ тогда благоухание из гроба твоего изыде и благодать велия явися,/ недуги исцеляющи и души лукавыя отгоняющи.

Слава, и ныне, Богородичен:

Славо вселенныя, Преславная Дево,/ Бога Преславнаго славно рождшая,/ славы сподоби Божественныя,/ яко Богородицу присно Тя славящия.

На хвалитех стихиры, глас 5.

Подобен: Радуйся, Живоносный Кресте:

Радуйся, мати Александро,/ звездо
пресветлая от Дивеева возсиявшая/ и
Российскую страну благодатно озарившая!/
Радуйся, славная подвижнице,/ древним
богоносным отцем уподобившаяся,/ душу твою
дом Духа Святаго соделавшая,/ храмы Божия и
обитель инокинем воздвигшая!/ Молися мир
мирови даровати/ и душам нашим велию
милость.

Радуйся, предстательнице наша,/
преподобная мати Александро!/ Ускори на
помощь нам, немощным и сирым,/ и вознеси
святыя молитвы твоя ко Господу,/ данною же ти
от Него благодатию/ недуги наша душевныя и
телесныя исцели,/ мирови мир даровати
испроси/ и душам нашим велию милость.

Радуйся, преподобная мати Александро!/
Первоначальнице обители Дивеевския,/ сосуде
благодати Божия/ и избраннице Царицы
Небесныя./ Радуйся, болящих исцеление,/
малодушных укрепление,/ заблуждших
путеводительнице,/ монашествующих
богомудрая наставнице!/ Помяни и нас в
молитвах твоих ко Господу,/ просящи душам
нашим велию милость.

Радуйся, богомудрая мати Александро,/ велия в женах и преподобных красото!/ Восхваляем смирение твое/ и любовь ко всем нелицемерную,/ имиже благодать Святаго Духа стяжала еси./ Темже честную память твою совершающим/ подаждь дары целебныя/ и моли Христа Бога/ мир мирови даровати/ и душам нашим велию милость.

Слава, глас 3:

Преподобная мати Александро,/ кто исповесть подвиги многотруднаго жития твоего/ и милости Божия, чрез тя явленныя, кто исчислит?/ Мы же, избранницу тя Пречистыя Богородицы ведуще/ и на дерзновение твое пред Богом уповающе,/ во умилении сердечнем зовем ти:/ о, преподобная мати наша!/ Помолися за ны/ и помяни нас во Царствии Небеснем.

И ныне, Богородичен, глас тойже:

Без семене зачала еси от Духа Святаго/ и родила еси Сына Божия,/ сего ради, славословяще, воспеваем Ти:/ радуйся, Пресвятая Дево.

Славословие великое и отпуст.

На Литургии

Блаженны от канона песни 3-я и 6-я. Прокимен, глас 4: Дивен Бог во святых Своих, / Бог Израилев. Стих: В церквах благословите Бога, Господа от источник Израилевых. Апостол к Галатом, зачало 208. Аллилуиа, глас 1: Терпя потерпех Господа, и внят ми, и услыша молитву мою. Евангелие Матфеа, зачало 104. Причастен: В память вечную будет праведник, от слуха зла не убоится.

